

太平寰宇記

第二十二冊

太平軍字記

卷二十一

太平寰宇記卷之八十四

劍南東道三

劍州

龍州

劍州

劍州

普安郡今理普安縣

禹貢梁州之域秦之蜀郡漢廣漢郡

之梓潼縣後漢因之不改按華陽國志云諸葛亮相蜀鑿石架空爲飛閣道以通蜀漢卽此郡晉以其地入梓潼郡宋齊如之梁天監中於此立南梁以在梁州之南故也梁末改爲安州後入西魏廢帝二年先下安州始通巴蜀因改安州爲始州取

郡邑更始爲名兼置普安郡隋初郡廢而州存大業初廢州爲郡唐武德元年復爲始州領縣七聖厯二年置劍門縣先天二年始改爲劍州取劍門山爲名天寶元年改普安郡乾元元年復爲劍州領縣七

普安 武連 陰平 劍門 梓潼 臨津 普成

州境

東西二百八十里 南北二百六十里

四至八到

東北至東京三千二百里

東北至西京二千七百里

北至長安二千里

東北至利州二百里

南至梓州三百六十八里

西至綿州二百里

北至利州一百六十三里

東南至閬州三百里

西南至綿州二百八十里

西北至龍州二百九十里

東北至利州一百九十里

戶

唐開元戶二萬三千五百

皇朝戶主七千五百三十六客八千三百四

風俗

同龍州

人物

景鸞

入儒林傳

李業

字巨游梓潼人入獨行傳

文齊

爲鎮遠將軍

土產

薑鞋

紗

絲布

舊貢蘇薰席

圖經云蘇家三陵草席

今貢巴戟

蠟紙

晉安縣

舊十三鄉
今十二鄉

本漢梓潼縣地魏立普安郡後郡

廢爲普安縣屬劍州

故壘山在州北按益州記

云姜維拒鍾會有故壘其山峭壁下臨絕澗卽此也卧龍山在縣東二里其山盤圍周布號卧龍

山高一百丈

武連縣

西八十三里舊
十三鄉今七鄉

漢爲梓潼縣地宋置武都郡

于此并置下辯縣又改下辯爲武功縣後魏廢帝

二年改名武連縣

治山一名五郡山周地圖縣

南有治山縣人張逸背梁附後魏與梁將楊乾運於此山下大戰乾運大敗死者千人恭帝元年收

骸骨併爲一墓死者五郡人因改治山爲五郡山

五子山在縣北七十三里西自龍州界迤邐斜

連馬閣山頂其山至此特起五峯鴈行相次高五

百丈因名五子山 龍祠山在縣東三里高三百

丈舊名九龍山唐天寶六年勅改名龍祠山貞觀

年中山上曾置九龍祠 小潼津發源在縣北七

十里京兆山分水嶺南名京兆水 廢下辯縣城

在縣南五里臨小潼水益州記云宋文帝元嘉二

十九年以武都流人于下辯縣安置大明二年改

爲武連縣隋大業九年移今理其城見廢

陰平縣

西百四十里
依舊十鄉

本漢梓潼縣地按顧野王輿地

志晉人流寓于蜀者仍于益州立北陰平郡西魏
廢帝二年定蜀改陰平爲龍安隋省龍安縣併爲
陰平縣屬始州按三國志鄧艾伐蜀自陰平縣景
谷步劍閣道懸車束馬逕出江油而至是此地也

馬閣山在縣北六十里北接梁山西接岷峨昔
魏將鄧艾伐蜀從景谷路出龍州江油縣至此懸
崖絕壁乃束馬懸車作棧閣方得路通因名馬閣
山 十八壠山在縣西南五十里高千餘丈岡巒
連屬十八壠因以爲名十二壠在綿州昌明縣界

六壠在當縣界 馬閣水在縣北源自龍州江油
縣大業山下來經馬閣山南流入縣界又七十一
里入梓潼縣界更名潼水 龍穴山在縣東北五
十里亦名龍像巖亦名龍血山古老相傳昔此山
有龍鬪死血變爲石宋齊于此置龍血戍益州記
云龍血東有龍像巖絕壁約萬餘丈有四石龍在
壁間今猶可驗巖之東北有洞穴莫測深淺泉出
其下

劍門縣 東北六十里舊本漢梓潼縣地 諸葛武侯相

蜀于此立劍門以大劍山至此有隘東之路故曰

劍門卽姜維拒鍾會于此唐聖厯二年分普安臨
漢陰平三縣地於方期驛城置縣 大劍山亦曰
梁山山海經高粱之山西接岷嶓東接荆衡王隱
晉書張載隨父收入蜀作劍閣銘益州刺史張敏
見其文乃表天子刻石于劍閣焉又有小劍山在
其西三十里故曰此爲大劍崔鴻十六國春秋苻
堅使楊安伐蜀徐成破二劍是也其山東連莎鼻
西接綿州凡二百三十一里故左太冲云緣以劍
閣也 大劍水 小劍水 石牛道常璩國志周
顯王時秦惠王謀伐蜀乃作石牛五頭朝瀉金其

後曰牛便金有養卒百人蜀人悅之使使請石牛
惠王許之乃遣五丁迎石牛入蜀至靜王五年秦
大夫張儀司馬錯等從石牛道伐蜀滅之 劍閣
道史記云蔡澤謂范雎曰今君相秦計不下席謀
不出廟廊坐制諸侯棧道千里通于蜀漢晉中興
書曰李特入漢州至劍閣顧盼險阻嘆曰劉禪有
如此地而面縛於人豈非庸才也 嘉陵江自鳳
州大散關發源從利州下流入縣界過廢始州在
縣西二十里有隋內史令李德林撰碑銘

梓潼縣

西南百六十里舊
十二鄉今四鄉

本漢舊縣屬廣漢郡華陽

國志云漢孝武元鼎元年置以縣東倚梓林西枕
潼水以此爲名蜀先主分置梓潼郡西魏於此置
潼川郡移縣於郡南三十里改爲安壽縣於此置
三年廢郡移縣復舊治猶以安壽爲名大業三年
還名梓潼 五婦山在縣北一十二里高四百二
十丈按蜀記云梓潼縣有五婦山秦王遺蜀王美
女五人蜀王遣五丁迎女至梓潼五丁蹋地大呼
驚五女並化爲石蜀王築臺而望之不來因名爲
五婦候臺漢書地理志云梓潼五婦山碑志存有
五婦山神廟李膺又云梓潼有鳴湍折碑祠西臨

潼水湍迅激流俗呼張湍祠亦呼爲石碑祠 長卿山在縣南五里舊名神山按圖經云唐玄宗幸蜀遙見山上有窟近臣奏此漢司馬相如讀書之窟勅改爲長卿山 兜鍪山在縣東十九里從武連縣東南來羣峯列勢如兜鍪之狀因以爲名 潼江水在縣西南四里源出陰平縣馬閣山來至五婦山西七曲山下名潼水漢書地理志云梓潼江水南流四里至墊江入涪水 隱劍泉在縣北十二里五丁力士廟西一十步古老相傳云五丁開劍路迎秦女拔蛇山摧五丁與秦女俱斃於此

餘劍隱在路傍忽生一泉又云此劍庚申日見

百神廟在縣南四里唐咸通十一年盧耽除四川
節度時蠻寇圍成都大將軍吳行魯統師過此見
斷碑皆古卿相之名遂心禱之願蕩除蠻寇旣而
王師大捷乾符三年行魯除東川節度使遂抽俸
於路側置百神之廟至景福大順之間廟遭兵火
王氏僭號夢見一百神人稱是梓潼百神未有祠
宇王氏因重與置皇朝乾德三年尅復西蜀又罹
兵火尋奉勅修葺今廟貌儼然 濟順王本張惡
子晉人戰死而廟存郡國志云惡子昔至長安見

姚萇謂曰卻後九年君當入蜀若至梓潼七曲山
幸當見尋至建元十二年隨楊安南伐未至七曲
山迷路遊騎賈君蒙忽見一鹿馳逐至廟門鹿自
死追騎共剝之有頃萇至悟曰此是張君爲我設
主客之禮烹食而去唐書云廣明二年僖宗幸蜀
神于利州桔栢津見封爲濟順王親幸其廟解劍
贈神時太子少師王鐸扈從至廟親覩皇帝解劍
授神因題詩云盛唐明主解青萍欲振新封濟順
名夜雨龍拋三尺匣春雲鳳入九重城劍門喜氣
隨雷動玉壘韶光待賊平爲報山東諸將相主持

勲業賴陰兵注云時術士言來春駕還京 蛟龍
神祠在縣東一十九里兜鍪山上俗呼爲兜鍪神
古老相傳此神昔用生人祭之不則瘴疾水潦爲
害張道陵誠之遂絕

臨津縣

東南一百三
里舊十鄉今九鄉

本邑西閬州之界壤也按舊

圖經云梁天監十八年分閬州於此置相源縣屬
巴西郡隋開皇七年改爲臨津縣以其俯臨津水
爲名唐先天二年改始州爲劍州其縣屬焉 掌
天山在縣西六十里益州記云掌天山在臨津縣
山多柘堪爲良弓雖麋絲燕角不能勝也 都竹